

Lozi - Piliswa Mañolo - Salvation Scriptures

BaEfese 2:2 Ka yona nako yani, ne mu latelela mikwa ye maswe ya lifasi.

**Ne mu lumelelana ni mubusi wa moyo ye maata ye mwa mbyumbiyulu,
ili ona moyo o' zamaisa ka nako ye batu ba ba hanyeza Mulimu.**

**Mateu 6:10 Ku tahe mubuso wa hao. Se si latwa ki wena si ezwe mwa
lifasi, sina mo si ezezwa mwa lihalimu.**

Luka 22:42 A li, "Ndate, haiba wa lata, u zwise sinwelo se ku na.

Nihakulicwalo, ku ezwe m'o latela wena, isiñi mo ni latela na."

**Joani 16:7-9 Nihakulicwalo, ni mi bulelela niti. Kwa neku la mina ki hande
ha ni zamaya, kakuli ha ni sa yi, Mutusi h'a na ku taha ku mina. Kono
haiba ni ya, fohe ni ka mi lumela yena. 8 Mi h'a ka taha, u ka t'o bonisa
niti ku ba lifasi. U ta bonisa hande za sibi sa bona, ni za ku luka ni za
katulo ya Mulimu. 9 Sibi ne si tile cwañi? Kakuli ne ba sa ni lumeli.**

**2 Timotea 2:10 Mi ki Iona libaka ha ni itiisa mwa lika kaufela kuli ba ba
ketilwe ki Mulimu ba fumane ni bona ku piliswa ko ku li teñi ku Jesu
Kreste, hamohocwalo ni kanya ye sa feli.**

**BaRoma 15:20,21 Kono takazo ya ka ne i li ku bulela Litaba ze Nde mwa
libaka mo ne ba si ka utwa za Kreste, ili kuli ni si ke na yaha fa
mutomo o n'o tomilwe ki u sili. 21 Sina mo ku ñolezwi kuli, "Ba ba ne
ba si ka bulelwa za hae ba ta bona, mi ba ba ne ba si ka utwa za hae
ba ta utwisia."**

**Likezo 2:36,37 "Cwale batu kaufela ba Isilaele ba swanezi ku zibisia kuli
yena Jesu yo, ye mu kokotezi fa sifapahano, ki yena ya ezizwe Mulena
ni Mesia ki Mulimu!" 37 Ha ba utwa manzwi ao, ba tabeha hahulu mwa
lipilu, mi ba bulela, ba li, "Banabahesu, lu ta eza cwañi?"**

**MaHeberu 4:2 Kakuli lu utwile Litaba ze Nde za bupilo sina bona ba ba ne
ba li teñi mwa lihalaupa. Ba utwile litaba zeo, kono ha li si ka ba tusa
se siñwi, kakuli niha ba li utwile, ha ba si ka li amuhela ka tumelo.**

**Jeremia 24:7 Ni ta ba fa takazo ya ku ziba kuli ki na Muñ'a Bupilo. Cwale
ba ta ba batu ba ka, ni na, ni be Mulimu wa bona, kakuli ba ta kutela ku
na ku lipilu za bona kaufela.**

**Likezo 16:14 Yo muñwi wa bona i ne li musali ya n'a bizwa Lidia wa munzi
wa Tiatira, ya n'a lekisanga masila a mafubelu a butokwa. N'a sebeleza
Mulimu, mi Mulena a kwalula pilu ya hae kuli a kone ku mamela ze ne
bulelwa ki Paulusi.**

Mateu 13:14,15 Cwale, se ne si polofitilwe ki Isaya sa petahala ku bona, ha kutwi, ‘Ku utwa, mu ka utwa, kono ha mu na ku utwisisa, ku bona, mu ka bona, kono ha mu na ku bonisisa. 15 Batu ba, ha ba koni ku utwisisa lika kapili, ba tibile lizebe za bona, mi ba itimile kwa meeto. Kabesicwalo, meeto a bona a ka swana a bona, lizebe za bona li ka swana za utwa, minahano ya bona i ka swana ya utwisisa, mi ne ba ka swana ba sikuluhela ku na, na ba folisa.’

Isaya 6:9,10 Cwale a ni bulelala ku y'o taluseza sicaba taba ye, “Niha mu ka teezeza cwañi ni cwañi, ha ku na tuso. Ha mu na ku utwisisa. Niha mu ka talima cwañi ni cwañi, ha ku na tuso. Ha mu na ku ziba se si ta ezahala.” 10 Cwale kih'a li ku na, “Eza mihupulo ya batu ba kuli i zizibale, lizebe za bona li tibane mi meeto a bona a foufale, kuli ba si ke ba bona, ba si ke ba utwa kamba ku ba ni kutwisiso. Kabesicwalo, mwendi ne ba ka sikuluhela ku na mi ba foliswa.”

Mareka 4:11,12 A li ku bona, “Mina, mu filwe ku ziba likunutu za Mubuso wa Mulimu. Kono ba bañwi, ba ba sa li kwande, ba bulelwa lika kaufela ka mukwa wa linguli feela, 12 ili kuli, ‘Kwa ku bona, ba bone, kono ba si ke ba bonisisa, ni ku utwa, ba utwe, kono ba si ke ba utwisisa. Kabesicwalo ne ba ka swana ba sikuluhela ku Mulimu, mi a ba swalela! ”

Joani 12:39,40 Ne ba sa koni ku lumela, kakuli Isaya n'a bulezi cwana hape, a li, 40 “Mulimu u timile meeto a bona, mi u kwalile kutwisiso ya bona, kuli meeto a bona a si ke a bona, ni minahano ya bona i tokwe kutwisiso, mi ba si ke ba talima ku na, ku bulela Mulimu, kuli ni ba folise.”

BaRoma 11:7,8 Cwale, ku bonahala kuli batu ba Isilaele ha ba si ka fumana se ne ba bata. Ki sitopanyana feela sa batu ba ba ketilwe ki Mulimu ba ba si fumani, mi haili buñata, ba ikeza bususu, Mulimu h'a ba biza. 8 Sina mo ku ñolezwi kuli, “Mulimu u unsufalize lipilu ni minahano ya bona. Ku t'o fita ku lona la kacenu le, ha ba koni ku bona ka meeto a bona, kamba ku utwa ka lizebe za bona.

2 BaTesalonika 2:10,11 U ka itusisa mufuta ufi ni ufi wa bumaswe ku puma ba ba ka sinyeha. Ba ka shwa kakuli ha ba si ka amuhela ni ku lata niti ye ne swanezi ku ba pilisa. 11 Kabakaleo, Mulimu u ka ba lumela maata a bupumi, kuli ba kolwe za buhata.

Mateu 13:18-23 “Cwale mu teezeza, mu utwe taluso ya nguli ya mucali. 19 Ba ba utwa linzwi la Mubuso kono ba sa li utwisisi, ba swana ni nzila mo ku wezi peu. Ya Maswe wa taha, mi u ba amuha se ne si calilwe

mwa lipilu za bona. 20 Ba bañwi ba swana ni mubu o kopani ni macwe mo ku wezi peu. Ba utwa linzwi, mi ba pakisa ku li amuhela ka tabo. 21 Kono ba li tokwisa sibaka sa ku tiya hande mwa lipilu za bona. Cwale ha ku taha matomola kamba manyando kabakala linzwi la Mulimu, ba tuhela kapili. 22 Ba bañwi ba swana ni mubu mo ku na ni mikakani. Ba utwa linzwi, kono maswenyeho a bupilo ni ku yembululwa ki bufumu za kena ku t'o pukutisa linzwi, mi la palelwa ku beya miselo. 23 Kono ba teñi ba ba swana ni mubu o munde. Bao ba utwa linzwi, ba li amuhela ka kutwisiso mi ba beya miselo. Ba bañwi ba beya mwanda, ba bañwi mashumi a silezi, ni ba bañwi mashumi a malalu.”

2 BaKorinte 3:15,16 Mane ni kacenu, ha ba bala libuka za Mushe, lisila leo li sa kwahela mihupulo ya bona. 16 Kono, sina mo ku ñolezwi, “Mutu h'a sikuluhela ku Mulena, lisila la zwiswa.”

Isaya 30:28 U tangeta moyo sina muunda o Iwala lika kamukana ku li isa kwahule. Moya wo, u fiyelela macaba kwa ku shwa, mi u feza milelo ya ona ye maswe.

Hosea 11:3-7 Bo, ki na ya lutile Isilaele ku zamaya. Ne ni ba sweli ka mazoho a ka, kono ha ba si ka lemuha kuli ni ba babalezi. 4 Ni ba sutelelize ku na ka lilato la ka. Na ba nanula mi na ba beya fa sifuba sa ka. Na inama, na ba fa lico. 5 “Ba hana ku kutela ku na, cwale ba swanezi ku kutela kwa Egepita mi ba ka y'o buswa ki Asiria. 6 Ndwa i ka kena mwa minzi ya bona ni ku lobakala likwalo za minyako ya minzi kamukana. I ka sinya batu ba ka kaufela kakuli ba eza mo ba hupulela. 7 Ba pihelezi ku zwa ku na. Ba ka lila kabakala joko ye ba beilwe kono ha ku na ya ka ba zwisa yona.

Likezo 26:18 Ni ku luma kuli u y'o ba kwalula meeto, kuli u y'o ba zwisa mwa lififi ni ku ba isa mwa liseli, ku ba zwisa mwa maata a Satani ni ku ba tisa ku Mulimu, ili kuli ka ku lumela ku na, ba swalelwe libi za bona, mi ba fumane sibaka sa bona mwahal'a bao ili ba Mulimu!”

2 Timotea 2:24-26 Kanti mutang'a Mulena h'a lukeli ku ba wa likomano. U swanezi ku ba ni musa kwa batu kaufela, ku ba muluti ya butali, ni wa pilu-telele. 25 U swanezi ku ba ya lukile h'a sikulula ba ba mu hanyeza. Mwendi Mulimu a ka ba fa sibaka sa ku baka ni ku ziba niti. 26 Kihona ba ta ba ni ngana hape, ba picuke siteo sa Satani ya n'a ba sweli ni ku ba hapeleza ku eza tato ya hae.

Sinulo 3:17-19 U bulela cwana, u li, “Ni fumile mi ni iketile. Ni na ni ze ni tokwa kaufela.” Kono ha u zibi kuli u mubotana ya nyanda luli! U njebwe, u mapunu, mane u sibofu. 18 Na ku eleza kuli u leke ku na

gauda luli ye nde, ye kenisizwe ka mulilo kuli u fume. U leke hape liapalo ze sweu kuli u apale, u pate mapunu a hao a swabisa. U leke ni mulyani wa ku beya mwa meeto a hao kuli u bone. 19 Na, ni kalimela ni ku nata be ni lata kaufela. Tukufalelwah, mi u tuhele libi za hao.

2 BaKorinte 7:10 Kakuli maswabi ao Mulimu u itusisa ka ona, a isa kwa ku baka, mi ku baka ku tahisa bupilo. Fo ha ku swabisi ni kamuta! Kono maswabi a za lifasi, ona, a tisa lifu.

1 Malena 18:37 U ni alabe, Muñ'a Bupilo! U ni alabe kuli sicaba se, si te si zibe kuli wena Muñ'a Bupilo u Mulimu, ni kuli u ba kutiseze ku wena."

2 BaKorinte 4:4 Ha ba lumeli kakuli mihupulo ya bona i unsufalizwe ki mulimu o maswe wa lifasi le. Mulimu wo, u ba hanisa ku bona liseli le li ba monyehela, ili liseli le li zwa kwa Litaba ze Nde za kanya ya Kreste, yo ili siswaniso luli sa Mulimu.

Luka 8:11-15 "Cwale taluso ya nguli ki ye. Peu, ki linzwi la Mulimu. 12 Batu ba bañwi ba swana ni nzila mo ku wezi peu. Ba, ba utwa kono Ya Maswe wa taha, mi u t'o zwisa linzwi mwa lipilu za bona, kuli ba si ke ba lumela ni ku piliswa. 13 Ba bañwi ba swana ni mubu o tezi macwe. Ba utwa linzwi, mi ba li amuhela ka tabo. Kono ha ba li fi sibaka sa ku toma mibisi. Ba lumela nakonyana feela, mi miliko ha i taha, ba wa kapili. 14 Peu ye wezi mwa mikakani yona i swana ni linzwi le li bulelezwi batu. Ba utwa, kono kabakala lipilaelo, takazo ya bufumu, ni minyaka ya bupilo ye kubukani mwa lipilu za bona, linzwi la shwa ba si ka beya kale miselo. 15 Haili peu ye wezi mwa mubu o munde, i swana ni linzwi le li bulelezwi batu. Ba li utwa, mi ba li amuhela ka pilu ye nde ye li tabela, mi ka ku tundamena ba beya miselo.

Likezo 15:11 Batili! Se lu kolwa kikuli lu ta piliswa ka sishemo sa Mulena Jesu, ka mukwa u li muñwi ni bona."

BaRoma 8:13 Kakuli ha mu pila ka ku latelela litakazo za mubili wa mina, mu ta shwa. Haiba mu tuhelelela likezo ze maswe za mina, ka tuso ya Moya, mu ta pila.